


Ositrán, natsipatami nokenayeti anampiki Perú



Tson okanta isankenatakoyetiro kenkitsarentsipe

Ashaninka





Organismo Supervisor de la Inversión en Infraestructura de Transporte de Uso Público

Tson okanta isankenatakoyetiro kenkitsarentsipe “Ositrán, notsipatami nokenayeti anampiki Perú”

Kenkitsarentsipe iroperotantsiri

Verónica Zambrano Copello

Jibabentiori ora Consejo Directivo

María del Rosario Bazalar Huamán

Amenakotirori ora Oficina de Comunicación Corporativa

Amenakotakerori

Ricardo González Vigil

Anahí Barrionuevo

Leonardo Dolores Cerna

Abiakerori:

Isankenare Jananekipe Yometari

Intakarori

Oshiyakota komashi

Matheo Valentino Rodríguez Alemán

I. E. Alexander Fleming de Arequipa

Apitetapaintsiri

Ishiyakota Osi

Lucero Shantal Fernández Shupingahua

Colegio de Alto Rendimiento de San Martín

Mabatapaintsiri

Okenkitstakota aatapiniti pitotsi jeri Yacumama

Jhony Armando Retis Caballero

Colegio de Alto Rendimiento de Ucayali

Isankenare Obametantatsiri

Intakarori

Aotsipe abisayetakeri

Jerver Lenin Gonzales Toledo

I. E. John F. Kennedy de Ica

Iro oinijantakotakerori ora Oficina de Comunicación Corporativa

Primera edición, noviembre 2024

Ari osaikakotakeri iroperotatsiri ara jitachari Biblioteca Nacional del Perú N.º 2024-12338

Impreso por Inversiones IAKOB S. A. C.

Jr. González Prada 615, Surquillo

Derechos reservados

Oinijantsi

Antinamane impoiji ayotero isankenatakoyetiri jananekipe, iroinijantanyarori okoaperotantari betsikayetachari ishiyakoyetanyari atiripe shiyakomentotsiki, iro kimoshiretakairi ajibatakanyarori amenakotero kenkitsarentsipe jitachari “Ositrán, notsipatami nokenayeti anampiki Perú”. Aparoni antaberentsi ajibatakanyarori yotanetantsipe.

Aka meka tson sankenatantsiki, aretakari ikarati 240 oametaripe ñanatatsiri 3ro imoiji 4to sekontaria, aisati yometantinkaripe oinijantatsiri yometantsipeki públicos jero privados timatsiri anampiki, ainijantakotanyarori nampitsipeki sankenarentsipe yantayetakeri sankenabereateipe, iñanayetanyarori koatsiri kiribirokika.

Oka kenkitsarentsipe, ikenkishireayetakeri jero abishimotakeriri sankenataintsiri ijajeitakera anitapiniti arakomentotsi, kareteraki, oisotakopinita antarope pitotsi, okenapiniti tren jero jitachari línea de Metro, iro oinijairi ora jitachari “Oshiyakota komashi”, ayotakotanyarori okoantari obetsikaotya jaoka okenayete shiyakomentotsipe tempa iro jibatakairori nampitsipe; terika ora “Ishiyakota Osi” ikanta yarakoti aparoni tsimeri mantsiyari iriyotantajearori iraraje, jero okoantari anitapiniti arakomentotsi imonkarantajearori ikoakeri.

Kenkitsarrentsi jitachari “Okenkitstakota aatapiniti pitotsi jeri Yacumama” oinijai amabentakotyaro impoiji akitetakayero nija jaoka aatapiniti pitotsipe asaikajeitanyari kametsa. Irori jitachari “Aotsipe abisayetakeri” ari intanakarori iriperotanyari aparoni obametantatsiri jero okoaperotantari kareterape ijibatakanyarori inampi maroni peroanope.

Osarentsikika, Ositrán oimoshirenkiriri oametaripe jeri obametantatsiri abiakerori poñayetachari Arequipa, San Martín, Ucayali jero Ica, intakanakarora ara regional impoiji akayetakeri antakantakeri ara oficina ashi Comunicacion Corporativa aretakarora osheki yometantsipanko maroniki nampitsi asaikajeitika.

Apasonkijeitiri yantabere amenakotakerori ñanarentsipe, kemperi jibabentakerori sankenareanti Ricardo Gonzales Vigil, jero irori editora Anahi Barrionuevo impoiji jibabentirori kiribiro aisati ñanaretsi ashi Ministerio ashi Cultura, Leonardo Dolores.

Abisake aparoni osarentsi, irosati atsipatabakajeita antiro intanakari perani, apansonkitiro amitakotake ora Ministerio ashi Cultura ainijantakotanyarori kenkitsarentsipe abiakerori, bakotainchari okarati iko ñanetantsipe, nampitsipe ñabetirori ñanetantsi timatsiri anampiki.

Verónica Zambrano Copello

Jibabentiori ora Consejo Directivo ashi Ositrán

Oshiyakota komashi

MATHEO VALENTINO RODRIGUEZ ALEMÁN

I. E. ALEXANDER FLEMING DE AREQUIPA

Intakarori

Isankenare Jananekipe Yometari

Aparosati otimini aparoni nampitsijaniki jitachari Puntovía, oshonkakarō otishipe jero abishimotiro aparoni nija shonkashonkatachari. Maroni atiripe saikantarori kametsa ikantajeita jero iriperori antaberiantipe, kantimaitacha chora ipomerentsijeitakari: okariperotake ikenantajeitari.

Ora meka iyareterate, ijitakeri ora osaikayeti komashipe, oshekini omorona jero otenkanape. Maroni shiyakomentotsi eiro okeantayetatsi omoronapeki timatsi ikenakairo antakotirori, irori ora oinijairori jaoka okantari ashiyakotantyarari, te onkonijatajeji, charinkacharinka okantaka. Meka jibatatsiri jitachari Don Elocuente, ikenkeshiriaka iramenakotero okametsatantyarari ikenantajeitari.



Aparoni kitaiteri ishipakiriake kametsa oriatsiri, meka yora Don Elocuente ikajemakantake irapatojeitya irapatoitapinitara inampiki. Ari ipokajeitake maroni atiripe, yapatojeitapaka opimantara perioriko, ikemantyariri ibinkatsarite, ari ikatiyaka jeñokimaji impoiji iñabetake shintsini ikanti:

—¡Noshaninkaite, anampitsite Puntovía okoa ontime iroperori karetera ankenantyariri!

Irotakekea, nokenkeshiriaka nojibatakaye aparoni poroyekito iriperori, ora: abetsike aparoni shompiarontsi nijaki. Kantimaitacha, iroperotatiye shompiarontsi jitachane Puntos Suspensivos.





Ari ichotankakaojeitakeri ishaninkaitepe,
ikimoshirejeitanake. Aikero iñabetanaji ijibare:

—Oka meka shompiarontsi ari otimake maba
otinkami kisoro jero kametsari. Aparope
osaboinitakearo pontoshi suspensivo. Aparope
otinkami onkametsatakayero jitachari
comillas iriori tsiomentotsipe ari ibetsikakoteri
tsaparentsi jitachari poematsantsarope. ¡Iro
shiyakabenterone akantayeta aparope!



Maroni ingeniero irantabejeitanake. Ora meka kiyakomentotsi oshipetakakero kipatsi iriori antabereantipe yobakero ikantetiri otinkami. Irori komashi, okantani oshitobakoti, amenayetiro antayetachari. Meka yapatoijetaka ikantetiri Pontoshi jero tsaparentsipe yapatojeibentakaro obetsikantanakeari kametsa ikantetiri oisoro shompiarontsi. Ora meka samitakobentatsiri osampitaka ariorika oshitoake kametsa.

Otsonkatantapakari, aretaka
yoimoshirenketero. Aroni
saikantarori Puntovía
yapatojeitaka otsapijaki nija.
Meka jibari itotakero jitachari
cinta marereari, ora meka
shompiarontsi ashi Puntos
Suspendivos obetsikaka
onompitaro nija.

**PUENTE DE
LOS PUNTOS
SUSPENSIVOS**

 **OSITRÁN**
Contigo en tu ruta

Maroni jananekipe ishishiyajeitaka kaayeki,
ijikotiro komashi. Yora antakoyetirori
shiakomentotsi ikenantakaro shompiarontsi
ishirontakeataka, yamenakotiro ikantetiri
pontoshi suspensivos jatatsiri inkiteki.
Irori jitachari poematsansarope
kimoshire okanta.




ENTE DE
PUNTOS
PENSIVOS



 **OSITRÁN**
Contigo en tu ruta

Ari meka, okametsatanake
ora Puntovía. Oshekitapake
torishitape, maroni
areyetainchari
ishiyakantakoyeta itsipataro
koomashi jero pontoshi. Meka
jibari, ikimoshiretake impoiji
iñabentakotakero iñabeteri:



—Notsipabintsarepe, akenkeshiriapinintero oka mekabetsikantsi te apinto oni shiminto jero ashironaki kisoni. Iro oinijantiroriaisati ayotiri abetsikantayetyari jero anebetaro akamantabakaya. ¡Oka kema shompiarontsi ashi Puntos Suspensivos amitakote akenkeshiriantyari abetsikayete, akametsajeitanyaro akonoakerorika jitachari tsaparentsipe kimoshiretakantatsiri!

PUENTE DE
LOS PUNTOS
SUSPENSIVOS

 **OSITRÁN**
Contigo en tu ruta

Ishiyakota Osi

LUCERO SHANTAL FERNÁNDEZ SHUPINGAHUA

COLEGIO DE ALTO RENDIMIENTO SAN MARTÍN

Apitetapaintsiri

Isankenare Jananekipe Yometari

Nonebetarora naniyeti noshinkiro jaoka nosaiki, aparoni ampantsi ishekitapake atiripe ara jitachari Callao, nopiyaja nanitapiniti kitaiteripeki, kayepeki kari majeretatsine timatsiri nampitsiki oshekitapake añantantsi, okakijitapakarora aatapiniti antarope aantayetyariri kirekipe kitatari. Netsikiaji nanibeti, nokimoshireti nameniro jaoka okenayeti shiyakomentotsipe jeri atiripe, nokemati poematanaintsiri.





Nopitsokanaka, noñati kipatsiki aparoni
jitachari saltapalito. Irinti aparoni tsimeri
kamarari chorentakeriri oriatsiri, te noñeri
kametsa ikantya, kempe ipariake jero
okarapake ishibanki. Te nosamaninkero,
nopokashitapakeri netsikiaji. Notsareapakero
nako najirikantyariri, shintsipaite
ishinetabakena. Ari nokemabakero ikoiri, ari
itsipabintsatakena. Ikoake iramitakoiteri,
narori meka nokoabeta notsipabintsatyari,
tsipatenane naniyetira aotsipeki.

Naretapaka nobankoki ari meka namenakeri abishimotakeriri saltapalito. Ari meka, netsikiaji nokantaka, nake napinaikantyariri jero naakero aparoni kaja nobayetirora abintarontsipe, napinaikirora ishibanki, nokenkesiriaka jaokatya okanta ikemabintsatiro oyatsinka. Ari meka nopajitakeri Osi, obajiro aparoni apatorentsi amabentakotirori aatapiniti antarope pitotsi okakiji noñakerira, kametsa noñakero nopajitakeri ikantara ikamarati.





Okitaitanmanake, nobashiñakero nantapinitiri kitaiteripeki. Nokoabeta noinijayeri Osi nonampi, aparoni nampitsi konoarori kametsayetatsiri potsorentsipe, okemetara opotsota nobankojaniki jaoka nosaikapiniti.


Ari notsipatanakari nanitakairi ara jitachari opimantayetara obanarontsipe, nokenitanaka aisati ara jitachari opimantayeta obararontsipe, kametsa ababisakero kitaiteri notsipatari Osi antaroki nampitsi, noñakeri ikimoshiretake. Aniyetira akenayeti, noñiri irokiki ojakari kimoshiretantsi, kimoshiretakakanari nasankaneki.

Meka Osi ishiyanakaro
saakitakairiri atiripe.
Kapichakitaitepeki, itinamana
nokemiro ipampoyi jero
isheshebatiro ishibankipe
nobankoki. Te ijokero
ipampoye irosati nantakearo
nosaboinaro notijakeri jero
noyotiki amitakotanari
nanitanyari okarati 20
osarentsi, impoiji notyeroa
kapichaji irataitanyari
inkatiye noshempaki.



Aparoni kitaiteri, nanibintsaitini paarikeki ashi
Callao, nokatiyakotapaka shintsipaite noñakerora
aparoni arakomentotsi okenanake jenoki inkiteki
ichorentakero oriatsiri oshibankiki. Ari yamenakero
iriori Osi irosati opeantanaka arakomentotsi,
irokiki, konija noñakero ikimoshireti, kempe
ikoabetaja iraraje, kantimaitacha, tekera
yabisakotaje ikarajake, otimatye
irooyakote intekatsitajerika...





Ari otenatimotapakena paita
abisatsineri pokatsine kitaiteripeki,
noyotake ariorika intekatsitake Osi,
ariya ijataje yaranaje, kantimaitacha,
jeirorika yabisakotaji okarakera ishibanki?
Ari aretimotakena nobashiretakotari
nokenkeshiriakotirira abishimotakeriri, kempe
okisotapainti nasankane. Kantimaitacha,
kitaiteripeki aikero atsipabintsatabaka, tekatsi ñantsi
nokantantyarori jaoka okantari notsipabintsatari.


Pashiniki kitaiteri, nametakarora nokenayeti naniyeti, nokenajeitake anitira arakomentotsipe jitachari Jorge Chávez. Noñapake osheki arakomentotsi okatiya, pashini iro osokije arakote okenanake jenoki inkiteki. Meka Osi irosati yamenake, kempe ikenkeshiriajiro arakomentotsi iñitakari. Ari nokeanake naniti, okantimotakarira Osi iñayetakeri, meka narori namemenatiro arakomentotsi narakotantyari. Irikea Osi irosati ikatiya noshempaki, kemperi aparoni choretantsi kari jokantatsine.



Nanitanake shintsipaite
irosati noñantapakaro
saikamentotsi, nosaikantyarari,
tempa iro narakote narori
pashiniki nampitsi. Noyotake
antyashiparitakena
narakotantyarari aisati tekatsi
noshiretya naretyari, irokea
nokoake noñeri Oshi yarakote,
okantabetakea te yarantyararo
ishibanki jero ara isaikira
antakotirori arakomentotsi.



Aranakera meka arakomentotsi, antaro
opokimotapakena nokimoshireti. Meka Osi
yamenabeti bentanaki, kimoshire ikantaka, te
noñapiniteriji inkimoshirete osheki. Aikerora
nokenakotanake inkiteki ibatsajanji
Osi opiyonkanaka okantakantiro
tampea osheshebatakanakero
arakomentotsi, noñati narakoti
notsipatari nosipabintsare,
akantashibetabakea. Teya
nokenkeshirempaji narakote
nontsipatyari notsipabintsare
kimoshiretakakenari nasankaneki.



Nanitakotapake
jaoka noshiretakaro
naretya, anireapiniti
arakomentotsi jitachari
Cadete FAP Guillermo del
Castillo Paredes saikatsiri
oipatsiteki región ashi San
Martín, pashini okantashitapaka
inkite, kitaisanteni. Ari
naniriajeitake netsikiaji,
namenanake, nokenkeshirianaka
obakera nintaron. Timatsi osheki noyoteri
jero noñeri. Ari meka noyotanakeri
eiro nokaratajitsi apiteni shiretsi saikatsiri
nampitsiki jitachari Callao,

timatsi nonkarajeitaje nanitanakerorika
naretakara pashini nampitsi, tempa
ari noñayeteri pashiniyetatsiri
añinkaripe timatsiri oipatsiteki
jitachari selva. Nomomkaratakero
nokoakeri, narakakeri Osi,
okantabetaka te irareji
ikantabetitani iriori, kantimaitacha,
osheki nantake noñantajeariri
inkimoshiretaje, yora meka
irijaniki añinkari onintakeri
nasankane ari nokantanake
namabentakotyari
irosati ikamantakea.

Timatsi nokantabajeri, okoaperotatya ontime anampitsiteki jaoka anitapinite arakomentotsipe, tempa iro amitakoteri aretanyarori pashini nampitsipe saikatsiri anta ikantetiri norte, oriente, centro jero sur anampikika Perú. Ari okantari, osheki okoaperota aisati jaoka onkeneri shiyakomentotsipe tempa iro jatakayene ayoyetanyarori kotsiyetachari pashinieki nampitsipe, ayotero yameyetari atiripe saikatsiri ara jitachari impanemashi, sharakamashi jero irori otimapakera inchatomashi. Nopasonkitiro shiyakometotsipe jero arakomentotsi, Osi jero narori naretakaro noshiretakaro naretya ara jitachari selva peroana.



Okenkitstakota aatapiniti pitotsi jeri Yacumama

JHONY ARMANDO RETIS CABALLERO

COLEGIO DE ALTO RENDIMIENTO UCAYALI

Mabatapaintsiri

Isankenare Jananekipe Yometari

Otimapakera osheki atiri aniyetatsiri, aatapiniti antaroje jero orijanekipe pitotsi amajatakotatsiri nijaki jitachari Ucayali, okenkitsatini aparoni kenkitsarentsi pesatori. Ikantajeiti atiripe, intsompoijaki nija isaikini jitachari Yacumama, antari maranke amabentakotirori antami jero kipatsi.

Iroishi, aparoni ebankari antabetatsiri aatapiniti pitotsipe jeri iriori Pedrito, aparoni jananeki amitakotantatsiri aisati irantabetira Iroishi, iyojeitirori okameka kenkitsarentsii kantakota Yacumama. Timatsi kantatsiri irointi tseyantsi, kantimaitacha apiteroka shirampari ikantajeiti timatsi oinijairi kenkitsarentsika.

Aparoni kitaiteri, imanakerora oriatsiri menkori, Pedrito jeri Iroishi iñajetakero pashini okantashitanaka nija. Otinanaka osheki jero antaro oshinke, okipatsijatanake, te onkemetyarorji okantapinita kitaiteripeki. Maroni pitotsipe osheshebayetana, ñatiro opokapake antaro tampea aayetanakero timayetatsiri. Shiyashiyani ikantajeitanaka saikatsiri aatapinitira antaro pitotsi.






Pedrito jeri Iroishi iroiki iyotakotero paita abisantakari
iñajetakeri ari ijajeitanake oisotakoyetara pitotsipe.
Meka Pedrito, ñake nijaki kari kametsatapatsine:
aparoni shiyabetyarone jitachari *monograma*
ochorentaka intsompoijaki nija. Yamenaperotanaiti,
iñati okariperotake jero oposayetaka oisoyetara
pitotsipe, otinkamepe jitachari muelle kotariayetaka
jero osheki inchakota marera obankajata nijaki.

Irosatira iramenajeitiro, Iroishi jeri Pedrito
iñajeitakero okipatsijatake nija. Osheki
kajarashi jokayetachari amajaporokiti impoiiji
shitijani okantaka. Okipatsijatantakari
nija, irokantakantakero kajarape ijokayetiri
antabeyetatsiri, te ikenkeshiriakoteroji
ibariperotatiro. Yora meka Yacumama, okanti
kenkitsarentsi, kisaka tempa yoipatsijayetakero
ibanko isaikantari.





Marankeka kari iñajetiri, kisaka, irotake
ibariperotantakarori oisotakoyetara pitotsipe,
kemperi: ariorika ishebatanakea yaajatanakero
nija, yoimitsitiyayetakero pitotsipe antaro kari
oisotakoperotachane, itiyankita antaro tampea
oimintsaroanakeriri antabeyetatsiri. Ari ikanta
yoinijantiro imashirenka, ikenkeshiriantyari atiripe
eiro yobariperotantarotsi nija.

Meka Iroishi jeri Pedrito ikenkeshiriajeitanaka paita yanyajeiteri eiro ikisantatsi Yacumama impoji jaoka ikantero onkitetantajeari nija. Ari meka, maroni ikantajeitanake yoimoshirenkero nija ipasonkitantyariri jero impeakotakajeri Yacumama, tempa ibariperotakero atiripe ibanko otimanakera osheki kajarashi.

Ipasonkitantyarori, yantajeitakerori kashiripaiteki. Yobanekatantakaro inchatyakipe oisoyetara pitotsipe, yobajeitake aisati obanarontsipe yobajeitari, kemperi ora, takacho ikonoakeri ibatsa chancho tashitainchari jero ikotsipatsatakero aroso. Ipasonkijeitakera, maroni ikantajeitake iramebentakotyaro nija jero eiro yoipatsijabetiro ijokayete kajara. Mekakia otimatye inkitetakayero kitaiteripeki.



Irantajeitirora ipasonkitiro, meka nija omajerejatanaji. Te ontimanaje antaro oshinke aisati te aneabajero tampea, kametsaityanake. Ari intanajari okametsaityanaji oisotakoyetara pitotsipe,

pashini okantashitanaja. Iroishi jeri Pedrito iñajeitakero okametsaityanaji antaberentsipe, kimoshire ikantajeitanaja saikajeitatsiri. Maroni antabetatsiri, iyojeitanake iroperori oametantsi, ari ikantajeitanake eiro ijokashibetarotsi kajara jero yobayetari nijaki.



Otsatakoyetara pitotsipe te apinto ipimantayete jero yamanantayete, aisati ari isaikiri Yacumama ipinkatsayeteri. Iroishi jeri Pedrito iyojeitanake oriorika amabentakotanakearo antami jero kipatsi impoiji apinkatsatero okantiri kenkitsarentsipe, ari asaikake kametsa antsipatyaro kipatsi, antami jeri añinkaripe.



Ari meka, ora nirontarori maranke amabentakotakaro nija osaikira tsompoijaki, okimoshireti yoimoshirenketakero impoiji ipinkatsayetakero atiripe jero iramabentakotajearo isaikajeitira.

Aotsipe abisayetakeri

JERVER LENIN GONZALES TOLEDO


I. E. JOHN F. KENNEDY DE ICA

Intakarori

Isankenare Obametantatsiri

Naretantakarori kariperotantsi

Ari intanakari maroni ara mirikorishiki 7 diciembre osarentsiki 2022. Betsikabetakana noinijantyarori noyotane ashi concurso nokeantyarori jitachari Carrera Publica Magisterial 2022 nampitsiki Ica, noshitoriatakera apite semana. Nokenkeshiriaka kametsa, nomaye osheki impoiji kapichakitaite nojatamane.



Kantimaitacha, pashini okantashitanaka isokijajeitatakerira aninkatsarite Pedro Castillo, okantakantiro ikoime irantero jitachari golpe de Estado. Oka

meka abisaintsiri, aretaka nampitsipeki.

Chora apatorentsipe kantanaintsiri te onkametsateji yantakeri pinkatsari, ishitobayetanake ministros. Tekatsira soraro jeri porishiya amitakoterine,

te yaretyaro ikoabetakari. Meka anampitsite te onkametsaityanaje. Orameka jitachari Panamericana Sur, iyojeitirora nampitsi jitachari Barrio Chino (km 262), oipatsiteki distrito ashi Salas Guadalupe, ara lca, ashitanaka, tekatsi abisanajantsine, maroni nokenkeshiriabetakari ari otsonkapaka.

Tsiteniriki te nosaikeji kametsa. Okantimonentanakena osheki, antarotimotanakena tsiteniri impoiji shintsini abisanake, shitoakotanake kamantantsi okantakota ashiyetanaka kareterape ajatantyarari pashiniki nampitsi. Te nomaanaje okantakantiro te noyoteji ariorika nomatakea nojate noshirebetakarora. Opokimotakena osheki kenkeshiriantsi noitoinaki, tempa eirorika nojati noinijantero noyotiri jaoka nokantyarari jero jaoka okantanakeari noshaninka, shitobakoyetanake kamantantsi abisaintsiri.



Maroni apatorentsipe te ñajeitero kametsa abisaintsiri, osheki kantimonentantsi timanaintsi. Oshekitanakera atiripe kaayeki, aikero okantimonentakena, te noyotanajeji paita nanteri. Nojate nampitsiki jitachari lca, kemperi tekatsi abishimotenane, kantaporokitanaka, kempe eiro nomatirotsi nojate. ¿Jaoka nokantyarari naretantyarari? ¿Ariya abishimotakena kariperotantsi ariorika nojatake? Aikero otsitenitanake, te nompochokitanaje, te ompokimotena nobochokine. Iro iberantakari oria ara apite oria, ñakenara apa te onimotenaji, ipokashitapakena ipoji ikantapakena:



—Notomi, otimatye pijate meka. Eiro poyakotirotsi abishe. Kantimaitacha, anajeitakena apiteroite nokenkeshiriane, te okantimotyana nosaika kametsa.



TERMINAL DE BUSES

Okantabetaka otsiteniperotake inkite, noshiyakotanaka imototeki apa nojatantyarisaikajetira shiyakomentotsipe. Tekera naretya, ikantakena, eirorika otimitsi anakempine pijatantyarina mpitsiki jitachari lca, naro anakempine nomototeki.

Te okantaitye kametsa nosaikika, te noñeji jaoka nonkenanakeri nojatantyarira. Irointi opimanta pasaje ajatantyarina mpitsiki jitachari Pisco. Nokenkeshirianaka nokanti, eiroyata nomatatsi nojate, nokemati ikantetakena:



—¿Pijatatyé Ica? Irinti obametantatsiri. Aisati ishiyakana, te noñeriji inkimoshirete, netsikiaji iñanatakana. Ikoabeta yaretitya nampitsiki iroinijantyarori iyotiri iriori. Te isaikeji apaniro, itsipataro ijina, iritsiro aisati itsipabintsare, obametantajeitatsiri, kemperi narori. Te nakityariji, irointi namenashitakari.

—Naroya obametantatsiri, kemperi abirori. Nojina aisati obametanti, nokoi narejeitya noinijantyarori noyojeitiri. Te nonkobajeite nompishityaro. Nokenkeshirianaka, te apaniro nokantya, timatsi pashinipe abishimotiriri abishimotankenari.

—¿Jaoka pikantiri? ¿Pikoi pijate abirori?
—isampinatakena, tekera nakanakeri,
pashini obametantatsiri okantanake:

—¡Aisati nontsipajeitanakeami! —te noñero
okantimonentyaro, shintsi okantaka.

Nomajeretapinti kapichaji nokemakerora, ari
namenakeri apa majeretaintsiri ikemi iriori.

—Nokantitanaka, tsame ankarajeitanake

—nokenkeshiriakotanakero nojina jeri notomi,
tempa iro shintsitakanakenari.

Nokantanake, ari nojatake. Noyotake te
onkametsaitye otikakara karetera. Kantimaitacha,
noñakerira pashini obametantatsiri ishiretaka
irijate iriori, iro noshiretantanakari narori.

Nabitsanojeitanaka meka nokarajeitakera otsi obametantatsiri tekera nontetanakearo shiyakomentotsi jitachari aoto, nopianakero notsaroaiti ikemebeitani pashinipe obametantatsiri nokaratakeri. Ari meka nojokanakeri apa, notetanakaro shiyakomentotsi, noñakeri apa ibashirenentanaka jero aisati ikimoshireti:



—Pamabentyaya notomi —iro ikantakenari apa tekera noshiyakotanake. Ari meka noshiyakojeitanaka nojajeitanyari anta Ica, te onkametsaitye anampi, te noyojeiteji paita abishimijeitenari noshiyakotanakearika. Irointi noyotake, eiro ajatitsi kametsa, tempa te nopinkatsatero abisaintsiri jero ikantakantakeri tikakerori karetera. Kantimaitacha, jatakena noshiyakotanaka.


Karetera kari noñapininte

Notejeitakarora aoto nokarajeitake koni, kari noyote irosati meka ibajirope jero irabeakerorika *nombramiento*, kantimaitacha, nopasonkijeitiro. Noshiyakojeitanaka nopoñakaka Chincha nojatantyarari Ica. Namenaajeitakero meka kamantantsipe, okantake, ara meka karetera abisatsiri ibetsiketirora ashiro jitachari Aceros Arequipa saikatsiri nampitsiki Pisco, tikaka, tekatsi abisatsine. Meka pashini obametantatsiri, ikantanake:



—Ari ankenakotanakeri ankeanake ara jitachari Pisco Playa, abisanakero ora San Andrés ashitobantajeari ara jitachari Paracas irosati aantajeero karetera jitachari Panamericana Sur, irosati aretantakea ashiretakarora aretyaro, Ica.

Kametsabetaka akenkeshiriajeitakari. Abisanakero aparoni nampitsi jitachari Pozo Santo, akimoshirejeitanake abisakero. Tekatsi shiyakomentotsi abisatsine kareteraki Panamericana Sur, te ontikeaji jero tekatsi shiyakomentotsi. Kantimaitacha, pashini okantashitanaka narejeitantapakarori jitachari nampitsi Barrio Chino. Noñapakero ashitaka karetera, betsenkaka okatiya osheki shiyakomentotsi jitachari aoto. Koatsiri yabisajeite iposakoyetiri mapikiki aisati isorejakoyetiri oyantate shiyakomentotsipe.



—Ari asaikanakeri aka —ikantanake obametantatsiri, itsaroanentake. —Beraka otsi oria, iro okitaitete, irori examen intyaro soti oria. Otimatye amene paita anteri.

Akoabeta ampiyajeme
akenantanakeari pashininiki
aotsi. Aretantapakari ara Pozo
Santo, te añabajero aotsi
konijasanotatsineri.
Amenanakerora jitachari
Google Maps, ari meka
obametantatsiri iñake pashini
aotsi intanainchari aparoni
antaro ashiyakorontsi ashitachari.
Akajemabetakari saikantarori
irashitariantyarori ashitakorontsi,
tekatsi saikatsine. Ari meka aparoni
obametinkaro, otatsinkakero
ashitakorontsi, ari ashitareanaka.




—¿Kametsataketya
ankenantanakearo aotsika?
—Nosampitakeri meka
obametantatsiri, ikantanake
itsaroanenkaki.
—Tekatsi ankenanake pashini, iro
apaniro kenatsiri —yakanake.
—Tsame añantyaroro. Oka meka
aotsi ari aanake nampitsiki lca.

Ari ashijakojeitanaka aotsiki, noñajeitatio antarotsantsa karetera iyoshitaka impanekimashi. Peanaka añabetantyarori serorariki, iro aijatake okenanakera pashini shiyakomentotsi. Aikerora ashijakota, amontsajeitakaro pashinipe aoto jero shiyakomentotsipe jatatsiri apoñajeitanakara.

—Jaoka okarati oria pishiyakotaka paretantyarori lca?
—isampitakeri antakotirori shiyakomentotsi aparoni obametantatsiri.
—Aretakaro soti oria ashijakota —ikantanake shirampari, iimintsaroanteri akarajeitakera ashijakota.

Berapaka oria koni kitaiteri koityapaka maba oria intantanakearori ora exámen. Eiro okantimonentantetsi, ikantanake obametantatsiri:

—Ishijakojeitaka tsiteniriki. Ari akanterori arori.

An illustration of a bus interior. A driver with short brown hair is seen from the side, holding the steering wheel. Several passengers are seated in the bus, their heads and shoulders visible. The bus is moving along a road that curves to the right. In the background, there are green hills, trees, and a small town with buildings and a factory with a red chimney. The sky is a pale blue.

Aikero ajatakoti ashiyakota impanemashiki antaroite. Eiro asampatatsi okantani akenkitsajeiti.

—Aririka aretakearo pashininta otishi impaneki, okakijitapake ora inkajare jitachari Huacachina —ikantanake aparoni obametantatsiri, ikimoshiretakanteri.

—Kantimaitacha tekatsi añinkari saikatsine, akenashijeitaka —ikantanake pashini obametantatsiri, itsaroanentake— irointi oshekitaintsi impanekimashi.

Tsaroajeitanake meka, kantimaitacha, añajeitakera intainajenka pankotsipe, opokimotapaji añenkare. Irosati aretantaka aparoniki nampitsi jitachari Carhuaz. Antaro akimoshirejeitake añakara iro aretyaro nampitsi Ica ashiretakari aretyaro.

Aretantapakari, ajokapaintiro ijina obametantatsiri yotantsipankoki jitachari Antonia Moreno de Cáceres. Anitanakera shiyakomentotsiki, amenabakajeitanaka, osheki añabentakoteri jero ainijantero akantaka aparope, kantimaitacha te ayotabakajeityaji. Ari nokantakero obametantatsiri tekera ojatanake:

—Noyakotiro pimatero pabiero pankero examen. Ari oshirontashireanaka omakonentake.

I. E. 22533
ANTONIA MORENO DE CÁCERES



Te akenkitsaperotanake. Shintsini nobetsatanakaro irosati ojatananaka. Ari meka nokenanake noñiri amenakotirori ora examen nosampitanyariri ariorika impabaje oria akeantyariri.

—Eiro, ari ashitanakeari ashitakorontsipe iberakearika 8:30 oria —yakanake amenakotirori— Eiro ikeanajitsi obametantatsiri abisakerika oria.





Notetapakaro shiyakomentotsi jatatsiri ara Tinguña,
mako nokantaka jero aakena notashe, tempa te
nobanakea shabiniji jero te nobamaña.

Ari meka ashintsijeitanake ashiyakotanaka. Pashini
obametantatsiri otimatye irijate yotantsipankoki jitachari
San Luis Gonzaga, narori ara yotantsipankoki saikatsiri
distrito jitachari Tinguña. Ari atsipariabakajeitanaka,
irosati meka, te añabakajeaji. Kantimaitacha osheki
nokimoshiretake, okantabetaka te noyoteroji ibajirope.

Naretantapakari
yotantsipankoki jaoka
narori nompe examen,
nosampibetaka aririka
impetabaje kapichaji
oria akeantyarori.



—Eiro, ikantetake eiro apabajitsi oria
inkeajetantyarori —ikantetabakena. Eiro
nopiashitantarotsi, nokeanake
yotantsipankoki nantantyarori
ora examen ashi *nombramiento*,
mako nokantaka. Aakena
antaro nomaore jero notashe,
kantimaitacha, naretantyarori,
iro shintsitakakenari
nomonkaratantyarori
nopokashitakeri
nopoñaka arejiki.



Abishimotakenari nopiyantajari

Ikamantetakenara eiro otimitsi pashini oria akeantyarini, shintsini nokeanake. Naretantapakari oametantsiki, noñapake tekeratsita inkeajeite: tekera yarejeityaji ara 50 % yometantinkaripe. Osheki ñabejeitatsiri netsikiaji, maroni amenabakajeitani. Irosati ayakojeitini, ikamantetake iroperori kamantantsi, ikantetake:

—Ari intanakearori examen iberapakiarika tsaparori oria, karimpa te yaretyaji yometantinkaripe inkeajeite oametantsiki, okantakatiro otikayetaka kareterape —ikantake jibabentirori, otmatye poyakojeitabake.

Nokemabintsataro nobochokine jero notashe. Irointi nirake kapichaji nija jero nojatake shitamentotsiki, tempa te ishineyeteji ashitobapainte kapichaji yotantsipankoki, akeajeitakera.

Abisake tsa minoto, noñiri ikeajeitapake obametantatsiri, ajeitakeri imakore. Isampijeitabakeri jaoka ikantajeitakerori yabisantakarori nampitsi jitachari Barrio Chino:

—Nanijeitake iberantakari apite oria, tsiteniriki —yakanake netsikiaji aparoni, okantakantiro imakotake osheki.

—Osheki pomerentsitantsi apokantakari, kantimaitacha, abisakero.



Maroni areyetapaintsiri konija imakojeitake,
timatsi obametantatsiri mapaintsi
isankenabetarora examen.
Okantabetaka ikoabeta isakijeiteme,
te yamabeteroji imaye, okantakantiro
imakojeitake, te yamenajeiteroji
kametsa ora examen. Meka
narori nokenkeshiriaka nokanti,
otimatye nomatero examen.
Nokenkeshiriakotanakeri notomi,

oimoshirenkerone aparoni irosarentsite. Iro
shintsitakakenari nomatantyarori nopokashitakeri.
Otsonkatantanakari oria, noipiyajiro examen, nokantake
nomatakeroyata. Noñaka nakakero kametsa. Meka
otime noyakotero
okonijatakote
naakotakeri.



Noshitobanjira yotantsipankoki, namenake meka noyari. Te nomatajeaji nomp iyaje ara Chinja, tempa te ontimeji shiyakomentotsi jatatsineri. Chora inabeta aoto koabetachari ojate, onkenanake nokenakotapake nopokantakari aretanyari irosati Ica, kantimaitacha, osheki opinatanaka pasaje.



—¿Omapero opinatanaka osheki pasaje?
—nosampitakeri aparoni antakotirori shiyakomentotsi.
—Je, te onkametsaitye kitaiteri —yakanake.


COMPAÑÍA DE BOMBEROS N° 171 OFELIA BANCHERO DE DATORRE



Ari nosabikanake tsiteniriki nokenanake ara
compañiaki tsibakirori pamari jitachari Ofelia Banchero
de Datorre 171 namitakotanti. Aretantapakari tominko, te
onkariperotanaje kitaiteri, obakera nopiyaja nobankoki
noshaninkaki, shintsini naretapaja. Kametsa nopiyaja. Iro
kenkeshiriakakenari maroni abishimotakenari.

Kenkeshiriansipe aotsiki

Naretantapajari nobankoki, abitsanotabajana nojina, niri, noniro, notsiro jeri iriori notomi, kantimaitacha, irosati nokenkeshiriakero abishimotakenari tempa iro amitakotakenari nopampitsashiriantyari. Nintabetanakari nojate noinijantero noyotiri ara examen opianaka aproni yometantsi nañantariki, oinijantyanari jaoka nokantari jero okametsatantari amitakoteri pashiniyetatsiri kari añapinite.



Otikayetakara kareterape añayetakeri nojatantakari pashiniki nampitsi, otsinampabetake, kantimaitacha, timatsi pomerentsitansi antaroperotatsiri: apinkatsateri pashinipe. Okoatya maroni kareterape ikenantayetyari atiripe jero obararontsipe,

iro okakijitakairori aretanyari nampitsipeki ampimantayetyari jero amanantayetyari akoiri kitaiteripeki. Te onkametsabetya antikero, tempa eiro ashinetirotsi koatsiri ijate pashiniki nampitsi, aisati eiro isaikajeititsi ashaninkape jero nampitsipe.

 **OSITRÁN**
**Supervisa esta
carretera**





Abishimotakenari aparoniki tsiteniri oinijakena okoantari ainijantero kametsa pomerentsitairi. Okoaperotatya ainijayero jero akantero akenkeshiriari, kantimaitacha, otimatye apinkatsateri pashinipe, eiro antanabetiritsi. Ainijantero pomerentsitairi otimatye amitakote akenkitsajeyantyarari amenantyarari amonkaratero akoiri, asaikajeyantyarari kametsa.

Nokenkeshirakerora abishimotakenari,
opokimotakapena nokenkeshiakero
namitakotanti, ora meka yantiri aparoni
shirampari tsibakirori pamari. Nomakera
compañiaki irashi tsibakirori pamari,



noyotanakero
iropertantari amitakotante
nampitsiki. Yora meka tsibakirori
pamari amitakotantatsiri, iriperori inajeiti,
okantani kitaiteripeki ibetsikajeita ijabatanyari intsibakero
pamari ariorika ikajemetakeri, kantimaitacha, otikakearika
kareterape eiro imatirotsi irijate tempapashini oni yatajeitiri.

Ariorika amitakotante ari oinijayeri iropertari amitakotantsi
jero amabentakotantsi anampiki jero jaoka ikoakoiti.
Okariperotakerika kitaiteri anampiki jero aipatsiteki,
kemperi abishimotakenari, añeri amitakotantatsiri
oimoshirenkiro añantari, opashinitakai atiriti.





Amenanakerika
abishimotakeri, te
apinto atsinampakero
pomerentsitansi
aretantyarari ara examen.
Irointi oyometake jaoka
okanta amitakotiri
pashinipe jero okoantari
antabejeite ampatojeitya
jero apinkatsatabakaya. Ari
noyotakeri, antsinampayero
pomerentsitansi, amitakote akenkeshiriantyarari
kametsa jero ainijantero akantayetara aparope.

Meka kitaiterikika nosaiki noametanti
yotantsipankoki jitachari John F. Kennedy
saikatsiri nampitsiki Chinchá.

ACTA DE EVALUACIÓN

FECHA: 23 de septiembre del 2024

Miembros del jurado: Ricardo González Vigil
 Anahí Barrionuevo
 Leonardo Dolores Cerna

Luego de realizada la evaluación de los cuentos participantes por el jurado calificador, conformado por Ricardo González Vigil, Anahí Barrionuevo y Leonardo Dolores Cerna, se procede a declarar a los ganadores del Séptimo Concurso de Cuentos "Ositrán, contigo por las rutas del Perú", en las categorías y en el orden de mérito señalado:

PUESTO	CUENTO	ALUMNO	I. E.	PROCEDENCIA
1.er puesto	El viaje de las comas	Matheo Valentino Rodríguez Aleman	Alexander Fleming	Arequipa
2.do puesto	El viaje de Osi	Lucero Shantal Fernández Shupingahua	Colegio de Alto Rendimiento (COAR) San Martín	San Martín
3.er puesto	La leyenda del Terminal y la Yacumama	Jhony Armando Retis Caballero	Colegio de Alto Rendimiento (COAR) Ucayali	Ucayali
Mención honrosa	¡Papá, viajaré alrededor del Perú con mi abuelo!	Marco Sebastian Cardozo Rosales	Colegio de Alto Rendimiento (COAR) Ucayali	Ucayali
Mención honrosa	El guardián de los caminos	Camila Luciana Rojas Alva	Sagrado Corazón de Jesús	Piura

PUESTO	CUENTO	DOCENTE	I. E.	PROCEDENCIA
1.er puesto	Caminos de prueba	Jerver Lenin Gonzales Toledo	John F. Kennedy	Ica


RICARDO GONZÁLEZ VIGIL
 Presidente


LEONARDO DOLORES CERNA
 Miembro


ANAHÍ BARRIONUEVO
 Miembro



www.gob.pe/ositrán



Síguenos en:



ositranneru



@ositranneru



ositrannoficial



@ositranneru



ositrann.pe



*Promoviendo
el talento y
la creatividad
literaria*